

## Pùrgawica

Sklónka stłëkłô. Dupa zbitô  
Axle, flipë, rittbergerë  
Zjachôł z dakù bël kòminiôrz  
Bò pòpada i mni zero

Padła białka z cãżką satką  
Leży brifka z lëstów taszą  
Bòżą przëwòłiwô Matkã  
Chłop, co flabã so rozgwaczôł

Tómk w szpagace sòdł rozplëskli  
Czësto krótkò swòji chëczë  
Doczołgôł sã w garaż cepłi  
Bùksë zmòkrzoné zeblecze

Łokce, kòlana nadczidłë  
Stoji tir pòd Naczków Górą  
Dzwòniã lëdzëska na gminã,  
Szôłës, radny... Dze ta sól je?

Dze je piôsk na to pùrganié?  
Sëpiã a to padô, mrozy  
Doczekómë Zmartwëchwstaniô  
Przë taczi pògòdze kòzy!

Wùja Alert dół òdkazac  
Co mdze tak jesz kask a përnã  
Cobë bùten nie wëlażac  
Lepi wtrëkac sã pòd pierznã

Chcemë skòrzëstac z ti radë  
A pòpùrgac sã jinaczi  
Zmerkają za rok ùrzãdë  
Skòczi w pòlsczi demògrafii...

Tómk Fópka, Chwaszczëno, 26 stëcznika 2026 rokù, gòdz. 5.02 p.p.